

1 Yoni

Yoni'a Yisasi'ae lo'kano uneno hu'nea afina ayatala'a hano huteno
aiyalekati aole alea anaka Yisasi ke ne'afea anaka'ae makopi ne'maiya
ve'kakeno Yisasife ala Yoni avo kamaleteno henaka'a kosufa leteno
mai'neno mani aole'ae mako'ae aise avo kamale'ne. Yisasi'a fali'neapati
hetino ko'ku'napi haitekeno Yoni'a 60 kafu akeva maiteno 1 Yoni ke
kamale'ne.

Maike maike hu lavamu nelamea ke nehe.

1 ¹Yisasi mako aki'a lavamu lami Kemo'ae. Ani Kemofe afi'na avo ka'na
lahapa'nepauve. Ani Kemo'a a'ke'ainaka ma mopa alo ohu'nea afina
aepa heno mai'nike'na akaeya naulakafati ake'na alakepa hu'na akete'na
nayateti atafa hu'noa ve'kae lahapa'nepauve. ²Ani hano ohu lavamu'mo
aepa ve'ka ako eno fole aike'na akete'na lamake hu'na lahapa'nepauve
ani maike maike hu lavamu'mo aepa ve'kae. A'ke'ainaka Afo'amo'ae
ne'maiyateti eno va'y'i hike'na ake'noe. ³Lakaeya'ae lapa'kaeya'ae afiteta
mako'ke laipa lakesale mai'neta kiki yo'kalo hisuna yafe ako akete'na afi'noa
ve'kae lahapa'nepauvanaketa lakaeya Afotimo'ae mafa'ne'a Yisasi Kalaisi'ae
mako'ke laipa lakesale maleta mai'neta kiki yo'kalo huta ne'maune. ⁴Lakaiti
amuse yatimo'a laipafi havaiteteno ala hisea yafe mani ke avopi ne'kaove.

Lakaeya hale yapi uteta hisune.

⁵Yisasi'a mani ke lahapaiketa afi'nona ke lapa'kaeya lahapa'nepauva
kemo'a ma kava hu'ne. Anumaya Koti'a hale ya mai'nea yafe akaeyapina
hani yana aiset'o a alaki ohane'ne. ⁶Ohane'niketa lakaeya "Akaeya'ae
mako'ke laipa maleta mai'none." huta nehutae'maki hani yapi uteta
hisunana lakaeya kasuke nehuta ke lamake kele uteta nohune. ⁷Uteta
nohuna'maki akaeya hale yapi mai'nea kava huta hale yapi uteta
hisunana mi'ko vayatimoki'ae mako'ke laipale maisunakeno Anumaya
Koti mafa'ne Yisasi kola'mo'a mi'ko hai'o'ae hao'otake yati sese huno ano
kalo pateketa honi'yati o'male ve a'ne ne'maune.

⁸Lakaeya "Hao'otake yati o'male'ne." huta nehisunana lakaiti
laipake'ke kasuke ke hune'atona yafe lamake kemo'a laipafina nohane.

⁹Lakaeya hao'otake kava nehuna yati huta fole aisunana Anumaya Koti'a afa'a lake o'atalekaiyanakeno kanale'ya huno lahaove latove nehuno aipa yuna yapati atalelateteno ani hao'otake yati alino ne'ataleno mi'ko hai'o'ae hao'otake yati ano kalo patesiketa honi'yati o'male vaya maikune. ¹⁰Lakaeya "Nakaeya hao'otake kava ohu'noe." huta hisunana Anumaya Kotife "Kasuke ke'ake ve'ka mai'ne." huta nehunakeno Anumaya Koti ke'amo'a laipafi o'male'ne.

Kalaisi'a laya hu ve'ka mai'ne.

2 ¹Nakaeya mafa'ne anak'a nimokitapa hao'otake kava ohisaya yafe ma avona lapa'kaeyateka ne'kaove. Ne'kaova'maki mako ve'kamo'a hao'otake kava hiseana laya hisea ve'kati mai'ne. Ani ve'ka hao'otake ya'a o'male ve'ka Yisasi Kalaisi'a lakaeyafe Afo'amoteka ke huno afine'ke. ²Anumaya Koti'a lakaeya hao'otake kava huna yafena aipa afino haviya hulate'nikeno Yisasi'a ani hao'otake yatilefe falikeno Anumaya Koti aipamo'a falu hikeno hao'otake yati alino atale'ne. Lakaeya hao'otake ya'alefe'ke Yisasi'a ofali'niki mi'ko ma mopale vaya'ai hao'otake yate'ae fali'ne. ³Hana ya huta Yisasina laipa ami'nona yafe afisune? Anumaya Koti ke male male'nea ke a'kame malesunana "Lamake Yisasina laipa amiteta akaeyafe ako afi'none." huta hukune. ⁴Mako ve'kamo'a "Nakaeya Anumaya Kotina ako ake'na alakepa hu'noe." nehuno'ae'maki ke male male'nea ke a'kame o'maleseana ani ve'ka kasuke ke'ake ve'kakeno lamake kemo'a aipafi o'male'ne. ⁵⁻⁶Mako ve'kamo'a Anumaya Koti ke a'kame ne'maleseana Anumaya Kotife lusiya huno hau ayamopafati nehaiye. Mako ve'kamo'a "Nakaeya Anumaya Koti'ae lo'ka'na ne'mauve." hiseana akaeya Yisasi'a hu'nea kava huno uneno hise. Ani kava nehuta ne'aketa "Lakaeya Anumaya Koti'ae lo'kata ne'maune." huta hukune.

Afu'akanana aipa ne'amea ve'kamo'a hale yapi ne'maiye.

⁷Vae nahau nayamopafati ne'nahaiya vaya'nimokitapa saufa ke male male'noa ke o'kaoki a'ke'ainaka ako afi'naya ke ne'kaove. ⁸Ani ke a'ke'ainaka kemaki meni ka'na lapaumomo ne'maloa kemo'a saufa kekana nehikeno hani yana hano nehikeno alakepa hale yana va'yi huteno ano ha nelea yafe Yisasi'a hu'nea kava'ae lapa'kaeya nehaya kava'ae ani lamake'ake ke lapavelikeno ani saufa laumomo male'nea kemo'a lamake nehe huta afi'none.

⁹Mako ve'kamo'a "Hale yapi mai'noe." nehuno'ae'maki nepu asa'amokife aipa afino haviya hune'apateseana ani ve'ka hale yapi o'mai'niki hani yapi'ke mai'ne. ¹⁰Nepu asa'amoki kanale'ya huno aipa ne'apamea ve'kamo'a hale yapi ne'maiyanakeno aulakamo'a kanale huno ne'akeanakeno mako hao'otake yapi ano kasalupalavino asaka huolavike. ¹¹Asaka huolavike'a'maki nepu asa'amokife aipa kafa nehapaeya ve'kamo'a

lusi hani ya'kefafi ne'maiyanakeno aulakafina lusi hani nehikeno ka uneno hisea kafe lusiya huno anekinaki huteno akeno alakepa huno no'ake.

¹²Mafa'ne anak'a nimokitapa Kalaisi akileti Anumaya Koti'a hao'otake yatapi ako lapahaove lapatove nehuno aipa yuna yapati alino atalelapate'nea yafe nakaeya mani ke ne'kaove. ¹³Lapa'kaeya afotimokitapa a'ke'ainaka ma mopa alo ohu'nea afina mai'nea ve'kamo aepa'a ake'naya vaya mai'naya yafe nakaeya mani avo ne'kaove. Inaki lapa'kaeya nahaea'yemokitapa Satana ako atapa akase'naya yafe nakaeya mani avo ne'kaove. ¹⁴Lapa'kaeya mi'ko mafa'ne anakana Afotimofe ako afi'naya yafe nakaeya mani ke ne'kaove. Lapa'kaeya afotimokitapa a'ke'ainaka ma mopa alo ohu'nea afina mai'nea ve'kamo aepa'a afi'naya yafe nakaeya mani ke ne'kaove. Lapa'kaeya nahaea'yemokitapa lo'kiyatapi hane'nikeno Anumaya Koti kemo'a lapa'kaeya lapa'ku'afi hane'niketapa Satana ako hatapa akase'naya yafe nakaeya mani avo ne'kaove.

Lakaeya ma mopale yafena olahaise.

¹⁵Lapa'kaeya ma mopale ya'ae mi'ko au'ava kava'aefena olahapaino. Mako ve'kamo'a ma mopale yafe haiseana alaki lamake huno Afotimona aipa no'ame. ¹⁶No'amea'maki mi'ko mopale vaya'moki nehaya kavana afa'a ameka apa'kufale haka ne'ya'ae apaulaka ake'a hapa'ye hu ya'ae apa'kufa ali'a hai ya'ae mi'ko inani akufa kavana Afotimotekati o'me'nea'maki afa'a ma mopaleti va'yi nehe. ¹⁷Ma mopa'ae haka ne'ya'ae mi'ko vaya'ae apaulaka ake'a hapa'ye hu ya'aena akola hano hukea'maki Anumaya Koti'a nehaiya kava nehisaya vaya'moki kanale'ya hu'a hano ohu apavamu ali'a akola maike maike hu'a maikae.

Kalaisi kame vaya'a ako va'yi hu'nae.

¹⁸Lapa'kaeya mafa'ne anak'a nimokitapa afeo. Ma mopa hano hisea kana'a ako fole ne'aikeno a'ke'ainaka "Kalaisi kame vaya'a va'yi hukefe nehae." haya ke ako afi'naya'maki meni nesu yate Kalaisi kame vaya'a ako va'yi hu'a mai'nae. Mai'naya yafe "Ma mopa hano hisea kanamo'a ako va'yi hu'ne." huta ako afi'none. ¹⁹Ani Kalaisi kame vaya'a lakaeya'ae maike'a ako latale'a u'naya'maki ani vaya'moki lakaeya afuna laipa lakesa o'afi'a alaki lakaeya vaya o'mai'naya yafenake'a latale'nae. Inaki lakaeya vaya mai'nininana lakaeya'ae kanale'ya hu'a mako'ae mainina'maki meni ako latale'naya yafe ako afi'none ani ako latale'naya vayana mi'ko lakaeya vaya o'mai'nae. ²⁰O'mai'naya'maki lapa'kaeya Fate Akufa Avamuna ako avale'netapa mi'ko'amokitapa lamake'ake ke afi'nae. ²¹Lapa'kaeya Yisasife lamake ke lahapapai'naya ke o'afi'naya yafe mani ke no'kaova'maki lapa'kaeya ako afi'nakeno ani lamake kemo'a kasuke ohuke hutapa ako afi'naya yafe mani ke ne'kaove.

²² Nala'a kasuke'ake ve'ka mai'ne? "Yisasi'a Anumaya Koti'a lakufa alino katisea yafe hute'nea ve'ka Kalaisi'a o'mai'ne." huno nehea ve'ka kasuke'ake ve'ka mai'ne. Ani ve'kamo'a Afotimo'ae Mafa'ne'amo'aefe "O'nahaiye." huno a'kame'ya ne'anamea yafenakeno Kalaisina kame ve'ka'a mai'ne. ²³ Mako ve'kamo'a Yisasina a'kame'ya amiseana Anumaya Koti Afo'amo'ae a'kame'ya ami'nea'maki mako ve'kamo'a Yisasife afino aipafi maleseana Anumaya Koti'ae afino aipafi ako male'ne.

Fate Akufa Avamu'amo'a lamake'ake ke laha'nepaiye.

²⁴ Lapa'kaeya a'ke'ainaka afi'naya ke alitapa lapaipafi maletapa alaki huli'netapa atafa hisayana Mafa'ne'a'ae Afo'amo'ae mi'ko afina lapa'kaeya'ae lo'ka'ana maika'ae. ²⁵ Maika'a'maki Anumaya Koti'a lakaeyafe huno lo'kiya vailateno inake hu'ne "Alaki maike maike lapavamu lapamikoe." huno lo'kiya vai male'ne.

²⁶ Kasuke'ake ke nehu'a "Havi kapi visae." hu'a a'a lapavataka hisaya vaya'aife afisaya yafe mani avona ako ka'noe. ²⁷ Ka'noa'maki Anumaya Koti'a Fate Akufa Avamuna ako lapami'niketapa lapa'kaeya aka avalakeno lapaipafi mai'nea'maki alu ve'kamo'a ke alino lapaya hisea ali'ya o'maleki Fate Akufa Avamu'mo'a mi'ko yafe alino lapaya nehe. Ani nehea ke kasuke ke nohiki alaki lamake ke'ake nehe. Alino lapaya nehea kava hutapa Yisasi'ae maitapa kamatapa maiyo.

Lakaeya Anumaya Koti mafa'ne mai'none.

²⁸ Inaki aise mafa'ne'nimokitapa Yisasi'ae maita kamatapa maiyo. Maita kamaesunakeno'aena Yisasi'a ko'ku'napakati elinesea afina koli ohuta akaeya aulakale hetisuna yafe lavuya ohisune. ²⁹ Lapa'kaeya "Yisasi'a alakepa aipa akesa'ae ve'ka hao'otake ya'a o'male ve'ka mai'ne." hutapa afitapa alakepa hu'naya yafe mako vaya'moki hao'otake ya'api o'male vaya alakepa kava huke huke nehaya vaya'moki "Anumaya Koti mafa'ne'a mai'nae." hutapa afi'nae.

Meni lakaeya Anumaya Koti mafa'ne mai'none.

3 ¹Vaehae Afotimo'a lakaeyafe lusiya huno hau ayamopafati nehaiya yafe akai'a lakaeyafe "Nakai'ni mafa'ne anak'a'ni mai'nae." huno nehe. Ani ke nehea yafe lusi lakesa afita lamo'yo aisune. Ani ke nehea'maki lamake lakaeya Anumaya Koti mafa'ne anak'a alaki mai'none. Ma mopale yafe amuse nehaya vaya'moki Anumaya Koti aepa'a afi'a alakepa ohu'naya yafe lakaeya'ae ani ya hu'a o'afi'nae. ²Ne'nahaiya vaya'nimokitapa meni lakaeya Anumaya Koti mafa'ne anak'a mai'nonanaketa henaka'a hana kava huta maisupi? Inani yafe lakaeya afita ha ole'none. Ha ole'nona'maki lakaeya henaka'a Kalaisi'a eno fole aisiketa laulakafati aketa alakepa huta ne'aketa aita yahae huta

akai'akana huta hapakaune huta afi'none. ³Ani yafe mi'ko vaya'moki Kalaisife apame'atiti hu'a akeva ne'maiya vaya'moki Yisasi'a hao'otake kava ohuno aipamo'a honi'ya ofai'nea kava hu'a alakepa kanale kava nehu'a akeva mai'nae. ⁴Mi'ko hao'otake kava huke huke huno ne'maiya ve'kamo'a Anumaya Koti ke male male'nea ke alino ne'atakaeye.

Hao'otake kava hu ya'mo aepa'amo'a Anumaya Koti ke male male'nea ke ali'a atakae ya hane'ne. ⁵Lapa'kaeya ako afi'nae Kalaisi'a hao'otake yati alino atalesea yafe ko'ku'napakati e'nea'maki akaeyapina hao'otake yana lamake huno o'male'ne. ⁶Kalaisi'ae lo'ka'a ne'maiya vaya'moki mi'ko afina hao'otake kava nohaya'maki mako ve'kamo'a hao'otake kava hu au'ava yateka a'kame ne'malea ve'kamo'a Kalaisina o'ake'neanakeno aepa'a alaki o'afi'ne.

⁷Vae aise mafa'neyaka'nimokitapa haviku mako ve'kamo'a havi kapi visaya yafe ano lapavataka hu yafenaki lapa'kaeya maitapa halove nehutapa maiyo. Kalaisi'a hao'otake kava nohea alakepa ve'ka mai'nea ya huno mako ve'kamo'a hao'otake kava huke huke ohisea ve'kamo'a alakepa ve'ka mai'ne. ⁸Mai'nea'maki mako vaya'moki hao'otake kava huke huke nehaya vayana Sata mafa'neyaka mai'nakeno a'ke'ainakati Sata'a hao'otake kava hume ne'ea'maki Sata ali'ya alino haviya huteno alino yaka hutalesea yafe Anumaya Koti mafa'ne eno fole ai'neane.

⁹Mako ve'kamo'a Anumaya Koti alite'nea mafa'ne mai'nininana hao'otake au'ava kava huke huke ohinine. Anumaya Koti Avamu'amo'a ani alite'nea ve'kamo aipafi mai'neanakeno Anumaya Koti'a ani ve'ka akai'a mafa'ne alitekeno mai'nea yafe hao'otake kava hu au'ava ya'mo a'kame a'kame huno o'maike. ¹⁰Alakepa au'ava kava nohaya vaya'ae Yisasi ke ne'afea nepu asa'amoki'afee nohaiya vaya'ae Anumaya Koti mafa'ne o'mai'nae. Ani au'ava ya'api ne'aketa "Ma ve'ka Anumaya Koti mafa'ne mai'ne." nehuta "Ma ve'ka Sata mafa'ne mai'ne." huta akekaune.

Nepu lasatimokifena laipa alakepa'afati nelahaiya yana lo'kiya yane.

¹¹A'ke'ainaka afi'naya kemo'a make hu'ne "Nepu lasatimokifena lapaipa alakepa'afati lahapaino." huno hu'nea ke afi'nae. ¹²Lakaeya Keni'a hu'nea akufa kava ohisune. Keni'a Sata mafa'ne mai'nea yafe akana'amona haekeno fali'ne. Na'ya hikeno Keni'a akana'amona amakino kite'ne? Akana'amo au'ava'mo'a alakepa hikeno akaeya au'ava'mo'a hao'otake kava hea yafe aipa afino haviya huteno haekeno fali'ne. ¹³Lapa'kaeya Yisasiteka lapa'ku'a ami'naya nepu nasa'nimokitapa ma mopale yafe amuse nehisaya vaya'moki kame alapatesaya yafena lapamo'yo o'aiyo. ¹⁴Lakaeya Yisasina apa'ku'a ami'naya nepu lasatimoki laipa ne'apamuna yafe lakaeya afi'nonana lakaeya hao'otake kava nehuta fali'nona yapati ako hetita maike maike lavamu alita mai'none huta afi'none. Inaki mako ve'kamo'a vaya'a aipa no'amea ve'kamo'a alaki fali au'ava yapi'ke mai'ne. ¹⁵Mako ve'kamo'a

nepu asa'amofe aipa kafa nehaeyana alaki mako ve'ka amakino kine'atea ve'ka mai'ne. Mai'niketapa lapa'kaeya ako afi'nae mako ve'kamo'a mako ve'ka amakino kine'ateanakeno ani ve'kamo aipafina maike maike hu avamuna ohane'ne. ¹⁶Yisasi'a lakaeyafe hau ayamopafati nehaikeno lakaeyaya laya hisea yafe avamu'a ataleteno fali'nea yafe vayatimokife lahau layamopafati nelahaisiketa hutesuna au'ava yana afi'nonanaketa lakaeyaae ani kava huta lakaiti lavamufe "Afa yane." huta ataleteta mako vayati aya hisuna yafe falisune.

¹⁷Mako ve'kamo'a ma mopafi afeno'ya male'neno akeseana mako nepu asa'amoki kafu hute'a nesaya ya'api o'male'nisikeno'aena hautakiteno aya ohiseana ani ve'kamo aipafina Anumaya Koti hau ayamopafati nehaiya yana alaki o'male'ne. ¹⁸Lapa'kaeya aise mafa'ne'nimokitapa afeo lakaeyaya vayatimokife "Lahau layamopafati nelahaiye." huta lakeleti'ae lavayaleti'ae ke ohisunaki nelafuki laipa apamisune. Lakaeyaya meka lahau layamopafati lahau hune'apateta apa'kaeya kanale kava huta hapa'mata ali'ya alipatesune.

¹⁹⁻²⁰Ani kava hisunana "Anumaya Koti lamake'ake ke afiteta mai'nona vaya mai'none." huta afiteta akaeyateka visunakeno laipamo'a kanale huno yuna hesea kava huke. Laipamo'a lakaiti hao'otake kava nehuna yafe "Anumaya Koti'a kake hulatekaiye." hu'a hisakeno Anumaya Koti'a laipa akaseno ala ve'ka mai'neno mi'ko yafe afi'nea ve'ka mai'nea yafenakeno laha'makaiye hutae nehune.

**Anumayaleka aipa ami'nisea ve'kamo'a
Anumaya Koti aulakalena koli ohuke.**

²¹⁻²²Ne'nahaiya vaya'nimokitapa afeo lakaeyaya laipamo'a "Hao'otake kava nehana ve'ka mai'nane." huno huolateseana lakaeyaya Anumaya Koti aulakale lo'kiya vaita hetita ne'maunanakeno lakaeyaya mako yafe lahaisiketa akaeyateka ke huta afine'konakeno ani yana nelame. Lakaeyaya akaeyaya ke male male'nea ke'ale a'kame ne'maleta akai'a nehaiya au'ava kava nehuna yafe afine'kona yana nelame. ²³Ani ke male male'nea kemo'a make hu'ne akai'a Mafa'ne Yisasi Kalaisi'a laha'maesea ali'ya ali'nea ya'ae aki'ale'ae afita laipafi ne'maleta laku'a amita alakepa huteta nepu lasatimokifena laipa alakepa'afati lahaise huno hu'ne. ²⁴Mako ve'kamo'a Anumaya Koti ke male male'nea kele a'kame ne'maleseana ani ve'kamo'a Anumaya Koti'ae lo'kano maikeno ani kava huno Anumaya Koti'a akaeyaae lo'kano ne'maiye. Anumaya Koti'a Fate Akufa Avamu'a lami'nikeno ani Avamu'mo'a laipafi mai'neno "Anumaya Koti'ae lo'katapa mai'nae." huno lave nele.

**Anumaya Koti lamake apaune vaya'ae
kasuke'ake apaune vaya'aefe hu'ne.**

4 ¹Ne'nahaiya vaya'nimokitapa afeo. Ma mopafina apa'ke'atikeke apaune vaya'moki "Anumaya Koti ke alita ne'one." hu'a e'naya'maki

mi'ko apaune laka hisaya ke afitapa lapaipafi o'maleo. Hokotetapa "Anumaya Koti'a hupateke'a e'nafi?" hutapa afitapa alakepa hutetapa apa'kaeya ke afeo. ² Ma kava hutapa aketapa aeto hukae. "A'ke'ainaka Yisasi Kalaisi'a ma mopafi elineno vayatafa mai'ne." hu'a hisaya vaya'aife "Anumaya Koti Fate Akufa Avamu'amo'a apa'kaeya apaipafi mai'ne." nehutapa aketapa aeto hukae. ³ "Yisasife afi'na naipafi male'noe." hu'a fole no'aiya vaya'moki Anumaya Koti Fate Akufa Avamu'amo'a apaipafi o'mai'nea'maki fate ve'kamo aune amena Kalaisi kame'a apaipafi mai'neanaketapa lapa'kaeya ani akufa aune amena esea ke ako afi'naya'maki ma mopale ako eno mai'ne.

⁴ Ne'nahaiya vaya'nimokitapa lapa'kaeya Anumaya Koti mafa'neyaka mai'nakeno mopale mai'nea Sata'a aise ve'ka mai'nea'maki lapaipafi mai'nea Anumaya Koti Fate Akufa Avamu'amo'a ala ve'ka mai'nea yafe apa'ke'atike ke laka'ake apaune vayana ako hapata apa'kase'nae.

⁵ Ani kasuke'ake apaune vaya'moki ma mopafati va'yi hute'a mopale yafe ke nehake'a mopale yafe amuse nehaya vaya'moki apa'kaeya ke ne'afe. ⁶ Ne'afea'maki lakaeya Anumaya Koti mafa'neyaka'a mai'nonake'a Anumaya Kotina ake'a alakepa nehaya vaya'moki lakaeya huna ke ne'afea'maki Anumaya Koti'a mafa'ne'a ali o'apate'nea vaya'moki lakaeya huna ke no'afe. Ani kava nehaya yafe lamake ke'ake nehea Anumaya Koti Fate Akufa Avamu'amo'ae kasuke'ake ke nehea aune ame'aeketa alakepa hu'none.

Anumaya Koti'a lahau layamopafati nelahaiya ya'mo aepa'a mai'ne.

⁷ Ne'nahaiya vaya'nimokitapa lahau layamopafati nelahaiya yana Anumaya Kotitekati e'nea yafe Yisasina apa'ku'a ami'naya nepu lasaki lusiya huta lahau layamopafati nelahaisiketa maisune. Mi'ko vaya'aife hau ayamopafati nehaisea ve'ka Anumaya Koti'a alite'nea ve'ka mai'neanakeno Anumaya Kotina akeno alakepa hu'ne. ⁸ Anumaya Koti'a lahau layamopafati nelahaiya ya'mo aepa'a mai'nea yafe mako ve'kamo'a vaya'aife hau ayamopafati nohaiyana ani ve'kamo'a Anumaya Kotina akeno alakepa ohu'ne. ⁹ Anumaya Koti'a ma kava huno lakaeyafe hau ayamopafati nehaiya ya laveli'ne. Akai'a alaki mako'ke mafa'ne'ake mai'nea'maki ani mafa'ne'a hutekeno ma mopafi elineno fali'nea yateti lakaeya maike maike hisuna lavamu alita maisuna yafe hutekeno eline'ne. ¹⁰ Hau ayamopafati nehaiya yana lakaeya Anumaya Kotina lahau layamopafati lahaisea yafe nohea'maki Anumaya Koti'ke hokoteno lakaeyafe hau ayamopafati nehaikeno akai'a mako'ke mafa'ne'a hutekeno ma mopafi e'ne. Lakaeya hao'otake kava huna yafe Anumaya Koti'a afino aipa haviya hulate'nea'maki Yisasi'a lakaeyatefe faliteno hao'otake kava nehuna yati alino atale'nea au'ava ya'amo'ke lakaeyafe hau ayamopafati nehaiya ya laveli'ne. ¹¹ Ne'nahaiya vaya'nimokitapa afeo.

Anumaya Koti'a ani kava huno lakaeyafena hau ayamopafati lusiya huno nehaiyanaketa lakaeya'ae ani kava huta vayatimokife lahau layamopafati lahaise. ¹²Lamake mako'ke ve'kamo'a Anumaya Kotina ake'nea ve'ka ma mopafi alaki o'mai'neanaketa lakaeya vayatimokife lahau layamopafati lahaiseana Anumaya Koti'a lakaeya'ae mai'neno Anumaya Koti'a lahau layamopafati lahaisea yana laipafi lami'nikeno kanale huno ala hu'ne.

¹³Anumaya Koti'a Fate Akufa Avamu'a lami'nea yafe lakaeya Anumaya Koti'ae lo'kata mai'nonakeno akaeaya laipafi mai'ne huta lakesa ne'afune. ¹⁴Ne'afunakeno Afotimo'a Mafa'ne'a mi'ko ma mopafi vaya apa'ku apame alino katisea yafe hutekeno e'niketa akaeaya ako aketa alakepa hu'nona yafe mani ke huta fole aita lahapa'nepaune. ¹⁵Lahapa'nepauna'maki mako ve'kamo'a Yisasifena "Akaeaya Anumaya Koti mafa'ne mai'ne." huno hiseana Anumaya Koti'a ani ve'kamo aipafi mai'nikeno akaeaya'ae Anumaya Koti aipafi mai'ne.

¹⁶Anumaya Koti'a lakaeyafe hau ayamopafati nehaiya yana ako afita laku'afi ne'malone. Anumaya Koti'a lahau layamopafati nelahaiya ya'mo aepa'a mai'niketa lahau layamopafati nehauna vaya'mokita Anumaya Koti aipafi mai'nonakeno Anumaya Koti'a lakaeya lapaipafi ne'maiye. ¹⁷Ani yafe lakaeya nepu lasatimokife lahau layamopafati lusiya huno lahau'nisiketa lakaeya ma mopafi ne'mauna au'avatimo'a Yisasi'a hu'nea kava huta mai'nona yafe Anumaya Koti'a kake hupatesea afina kake hulatesea yafe koli huta lavuya ohukune. ¹⁸Anumaya Koti'a hau ayamopafati lusiya huno mako ve'kae hau'neanakeno ani ve'kamo'a koli hu ya'a ako alino ne'atale. Mako koli nehea ve'kamo'a Anumaya Koti'a akaeystafe lusiya huno hau ayamopafati nehaiya ya saufa afino alakepa ohu'nea yafe "Hao'otake kava hu'noa havi anona'a alikoe." huno nehikeno koli hu ya fole ai'ne.

¹⁹Anumaya Koti'a hokoteno lakaeyafe hau ayamopafati hau'nea yafe lakaeya'ae ani kava huta nepu lasakifena lusiya huno nelahaiye. ²⁰Mako ve'kamo'a "Anumaya Kotife nahau nayamopafati ne'nahaiye." huteno Yisasina aku'a ami'nea nepu asa'amofe aipa kafa heteseana ani ve'ka kasuke'ake ve'ka mai'ne. Amete mai'nea nepu asa'amona hau ayamopafati ohaiseana ani kava huno o'ake'nea Anumaya Kotina hau ayamopafati ohauke. ²¹Anumaya Koti'a ke male male'nea kemo'a inake hu'ne "Anumaya Kotife hau ayamopafati nehaiya ve'kamo'a ani kava huno amete ne'maiya ve'ka Yisasina aku'a ami'nea nepu asa'amona lusiya huno hau ayamopafati haise." hu'ne.

**Yisasife afi'a apaipafi male'naya vaya'moki ma
mopafi hao'otake kavana akase'nae.**

5 ¹"Yisasi'a Anumaya Koti'a lakufa alino katisea yafe hute'nea ve'ka Kalaisi'a mai'ne." hu'a afi'a apaipafi malesaya vayana mi'koma'a

Anumaya Koti mafa'neyaka maike'a Afo'apimofe Anumaya Kotife nehapaike'a ani Anumaya Koti'a mafa'neyu'aena hapau apayamopafati nehapaiye. ²Ani ke afi'nona yafe lakaeya Anumaya Kotife lahau layamopafati nelahaiseana akaeya ke a'kame malesunana akaeya mafa'neyaka'aena lahau layamopafati nelahaise. ³Lakaeya Anumaya Kotife lamake huno lahaiseana akaeya ke a'kame malekaune. Akaeya kemo'a kana nolahaiye. ⁴Kana nolahaikeno Anumaya Koti'a akai'a mafa'neyaka alilate'nea vaya'mokita ma mopale hao'otake kavana ne'ataleta ako ane'kasone. Akaeyafe afita laipafi maleta laku'a amuna yafe ma mopale hao'otake kavana ne'ataleta ako ane'kasone. ⁵Nala'a ma mopafi hao'otake au'ava yana ako ataleno ane'kase? Yisasife "Anumaya Koti mafa'ne mai'ne." huno afino aipafi male'nea ve'kamo'a ma mopafi hao'otake kavana ataleno ako ane'kase.

Anumaya Koti'a mafa'ne'amofe huno kafino hapapai'ne.

⁶Ani ve'kamo'a Yisasi Kalaisi'a ko'ku'napakati elinekeno akaeya liteti faletetekeno falikeno kola'amo'a lapetape huno lavea yateti "Anumaya Koti'a laku lame alino katikefe hute'nea ve'ka mai'ne." huta afi'hone. Ani ve'ka liteti'ke eno lave oli'niki akaeya kola'leti'ae eno laveli'nikeno Anumaya Koti Fate Akufa Avamu'amo'a lamake'ake kemo aepa'a mai'nea yafe Yisasi Kalaisife huno fole ne'aiye. ⁷⁻⁸Yisasi'a Anumaya Koti'a lakufa alino katikefe hute'nea ve'ka mai'nea yafe aole'ae mako'ae ya'moki hu'a fole ai'a laha'nepaiye. Anumaya Koti Fate Akufa Avamu'amo'ae li'mo'ae kola'amo'ae laha'nepai'a mako'ke akufa ke'ake laha'nepaiye. ⁹Laha'nepaiketa lakaeya vaya'moki haya ke ne'afuna'maki Anumaya Koti'a hu'nea kemo'a vaya'moki nehaya ke apa'kaseno ala hu'nea yafe afisune. Anumaya Koti'a inake hu'ne "Yisasi'a nakai'ni mafa'ne mai'ne." huno fole ai'nea ke afisune.

¹⁰Anumaya Koti mafa'ne'amofe afino aipafi maleteno aku'a ami'nea ve'kamo'a Yisasife aipafi ako afi'nea'maki Anumaya Kotife afi'a apaipafi o'male'a apa'ku'a no'amea vayana Anumaya Koti'a "Yisasi'a nakai'ni mafa'ne." huno hu'nea ke o'afi'naya yafe Anumaya Kotife "Kasuke ke'ake ve'ka mai'ne." hu'a nehae. ¹¹Ani Anumaya Koti'a lamake huno hu'nea ke'amo'a ma kava hu'ne "Anumaya Koti'a akola maike maike hisaya lapavamu ako lapami'ne." huno hu'ne. Ani akola maike maike hisuna lavamu'mo aepa'a akai'a mafa'ne mai'ne. ¹²Mai'nea yafe Anumaya Koti Mafa'ne'amofe Yisasife "E'ka naipafi maiyo." huno hikeno Yisasi'a e'neanakeno aipafi mai'nea ve'kamo'a ani akola maike maike hisea avamu ako ali'neal'maki Anumaya Koti Mafa'ne "E'ka naipafi maiyo." huno ohu'nea ve'kamo'a Yisasi'a akae aipafi o'mai'nea yafe akola maike maike hisea avamu o'ali'ne.

Lakaeya maike maike hu lavamu ako ali'nona yafe ako afi'none.

¹³Lapa'kaeya Anumaya Koti Mafa'ne'amo aki Yisasi akilefe afitapa lapaipafi male'naya vaya'aife "Akola maike maike hisuna lavamu

ako ali'none." hutapa afitapa alakepa hisaya yafe mani avo ka'na lahapa'nepauve. ¹⁴Lakaeya Anumaya Koti'a nehaisea yafe akaeyate afikesunakeno afike. "Afike." huta afi'nona yafe akaeyafe koli ohuta akaeyateka eta afine'kone. ¹⁵"Anumaya Koti'a mi'ko lakaeya ke huta afine'kona ke ne'afe." huta afi'nona yafena mako ya'aena afi'none "Anumaya Kotife afine'kona yana lakaeya ako alikaune." huta nehune.

¹⁶Mako'ke ala hao'otake kava nehisayana akola fali'a ata kapi u'a maisaya akufa kava hane'ne. Ani ala hao'otake kava nehea ve'kamofe Anumaya Kotiteka ke hu'ka afiko hu'nae nohoe. Noho'a'maki nepu kasa'kamoki hano ofalisea hao'otake kava hu'nisike'ka ake'kaefena Anumayamoteka akaeyafe afikesanakeno akola maike maike hisea avamu amike. ¹⁷Mi'ko hao'otake au'ava kava nehuna kavana alaki hao'otake kava nehuna'maki ani hao'otake kavafe laipa aita yahae hisunana akola ofalikune.

¹⁸Lakaeya ako afi'none Anumaya Koti alite'nea mafa'ne'amo'a hao'otake kava hu au'ava kavana huke huke huno ohininina'maki Anumaya Koti'a alite'nea mafa'ne Yisasi'a au'ne'veiya yafe Sata'a alino haviya hupatekefe eno apatafa ohuke.

¹⁹Lakaeya ako afi'none Anumaya Koti'a lakaeya lavamu'mo aepa'a mai'niketa akai'a mafa'neyaka mai'nona'maki mi'ko mopale vaya'moki Sata ayapi ne'maikeno ala kava ve'ka'api mai'neno "Nakaeya ke afeo." hu'ne.

²⁰Hu'nea'maki lakaeya ako afi'none Anumaya Koti Mafa'ne'amo'a eno alaki lamake nehea Anumaya Koti aepa'a aketa alakepa hisuna laipa lakesa ako lami'niketa afiteta Yisasi Kalaisi Anumaya Koti Mafa'ne'amo aipafi mai'nona yafe ani kava huta alaki lamake nehea ve'kamo aipafi mai'none. Ani ve'ka alaki lamake Anumaya Koti mai'neno akola maike maike hisuna lavamu'mo aepa'a mai'ne. ²¹Mai'neanaki aise mafa'ne'nimokitapa kava yakai'netapa apa'ke'atikeke anumayamofe afitapa lapaipa o'apameo.